



GARIS PANDUAN

PELAKSANAAN IBADAH KORBAN

NEGERI PULAU PINANG

TAHUN 1444H / 2023M

JABATAN HAL EHWAL AGAMA ISLAM PULAU PINANG



**GARIS PANDUAN
PELAKSANAAN IBADAH KORBAN NEGERI PULAU PINANG
TAHUN 1444H / 2023M**

1.0 PENDAHULUAN

Garis panduan ini disediakan untuk menjadi dokumen rujukan kepada pengajur, jawatankuasa dan pelaksana ibadah korban di Negeri Pulau Pinang dalam melaksanakan ibadah korban bagi tahun 1444H / 2023M.

2.0 LATAR BELAKANG

- 2.1 Ibadah korban merupakan salah satu ibadah yang sangat dituntut untuk dilaksanakan oleh umat Islam dan hukumnya ialah Sunat Muakkad. Pensyariatan ibadah ini adalah bagi memperingati peristiwa pengorbanan dan ketaatan Nabi Ibrahim A.S yang diperintahkan oleh Allah S.W.T melalui mimpi untuk mengorbankan anak baginda iaitu Nabi Ismail A.S berdasarkan firman Allah S.W.T dalam ayat 102, Surah As-Saffat yang bermaksud:

“Wahai anakku, sesungguhnya aku melihat di dalam mimpiku bahawa aku menyembelihmu. Maka fikirkanlah apa pendapatmu!” Anaknya menjawab, “Wahai bapaku! Lakukanlah apa yang telah diperintahkan kepadamu. Insya-Allah kamu akan mendapatkan aku termasuk orang- orang yang sabar!”

- 2.2 Garis panduan ini diwujudkan sebagai panduan kepada pihak-pihak berkepentingan untuk melaksanakan ibadah korban dengan tertib dan sempurna mengikut syiar Islam dengan tidak membelakangkan ketetapan atau peraturan yang dikuatkuasakan oleh kerajaan.

3.0 OBJEKTIF

- 3.1 Mewujudkan panduan spesifik dan komprehensif kepada pegawai, jawatankuasa ibadah korban, masjid dan surau serta petugas yang dilantik bagi melaksanakan ibadah korban.
- 3.2 Mengangkat ibadah korban yang menjadi salah satu syiar Islam dan amalan umat Islam dapat diteruskan dengan lebih sistematik.
- 3.3 Menyesuaikan beberapa norma baharu kehidupan yang diambil pengajaran daripada musibah COVID-19 dalam pelaksanaan ibadah korban berteraskan Maqasid Syariah dan Kaedah Fiqh.

4.0 PANDUAN PELAKSANAAN DAN TINDAKAN

4.1 Prinsip Teras Kawalan

Tahap kesedaran dan kebertanggungjawaban penuh daripada jawatankuasa ibadah korban, masjid dan surau serta petugas yang dilantik amat penting bagi mencapai tujuan teras kawalan ini. Ia meliputi keperluan memahami skop tugas, perincian tanggungjawab serta kemahiran petugas untuk memastikan kejayaan pelaksanaan ibadah korban dijalankan mengikut perundangan yang dikuatkuasakan selain menjamin aspek *halalan toyyiban* (halal, bersih, selamat).

4.1.1 Kepatuhan Dan Peraturan Undang-Undang

- a) Jawatankuasa ibadah korban, masjid, surau, Jabatan Kerajaan, Badan Berkanun, Agensi Swasta, Institusi dan Pertubuhan Bukan Kerajaan (NGO) serta orang perseorangan yang akan melaksanakan ibadah korban hendaklah mematuhi undang-undang dan peraturan yang dikuatkuasakan.
- b) Pihak yang dinyatakan di perenggan 4.1.1 (a) tidak dibenarkan untuk melaksanakan ibadah korban melainkan **setelah mendapat semua dokumen kelulusan berkaitan sembelihan ibadah korban (Sijil Kesihatan Veterinar, Akuan Kebenaran Pindah dan Permit Sembelihan Luar)** daripada penternak/ pengusaha ternakan/ pembekal haiwan korban.

- c) **Hanya penternak/ pengusaha ternakan/ pembekal haiwan korban** sahaja yang perlu berurusan dengan Pejabat Perkhidmatan Veterinar Daerah terdekat [bermula 12 Jun 2023 (Isnin) sehingga 23 Jun 2023 (Jumaat)] bagi mendapatkan dokumen berikut:
- i. Sijil Kesihatan Veterinar (SKV);
 - ii. Akuan Kebenaran Pindah Keluar (AKPK)/ Akuan Kebenaran Pindah Masuk (AKPM);
 - iii. Permit Sembelihan Luar (PSL).

**1 Permit Sembelihan Luar bagi 1 lokasi tempat penyembelihan dan semua bayaran dokumen adalah seperti ketetapan pihak Jabatan Perkhidmatan Veterinar Pulau Pinang*

- d) Penternak/ pengusaha ternakan/ pembekal haiwan korban perlu menyerahkan ternakan korban beserta dokumen **Sijil Kesihatan Veterinar, Akuan Kebenaran Pindah dan Permit Sembelihan Luar** kepada jawatankuasa ibadah korban, masjid, surau dan pihak-pihak lain yang dinyatakan di perenggan 4.1.1 (a).
- e) Tujuan dokumen tersebut adalah untuk memastikan ternakan yang akan disembelih berada dalam keadaan sihat, tidak terlalu kurus, tidak tempang dan bebas dari sebarang kecacatan dan penyakit. Aktiviti ini bertepatan dengan maksud Hadis Rasulullah S.A.W yang diriwayatkan oleh Al-Barra yang bermaksud:

“Empat perkara yang menyebabkan binatang tidak sah dijadikan korban ialah binatang yang jelas buta sebelah mata, penyakit yang nyata, jelas tempang dan terlalu kurus”.

4.1.2 Tindakan Nyahkuman (Sanitasi)

Pihak yang dinyatakan di perenggan 4.1.1 (a) perlu memastikan tempat penyembelihan dan semua peralatan yang digunakan bebas daripada sebarang bakteria melalui proses nyahkuman mengikut tatacara yang telah ditetapkan oleh Kementerian Kesihatan Malaysia dan Jabatan Perkhidmatan Veterinar **sebelum dan selepas pelaksanaan ibadah korban.**

4.1.3 Syarat Kelayakan, Tanggungjawab Petugas, Pengajur dan Peserta Ibadah Korban

a) Syarat Kelayakan Petugas

- i. Terbuka kepada semua lapisan masyarakat;
- ii. Mahir dan berkebolehan menjalankan kerja kerja berkaitan korban;
- iii. Petugas hendaklah berada dalam keadaan sihat dan tidak bergejala sewaktu ibadah korban dijalankan; dan
- iv. Petugas yang masih dalam tempoh kuarantin tidak dibenarkan hadir.

b) Tanggungjawab Petugas

- i. Digalakkan memakai pelitup muka (*face mask*) di ruang tertutup (contoh : di dalam bangunan);
- ii. Digalakkan membersihkan tangan dengan kerap menggunakan sabun pencuci atau *hand sanitizer*;
- iii. Penggunaan pisau dan peralatan penyembelihan tidak digalakkan berkongsi dan

perlu dibawa sendiri; dan

- iv. Memastikan semua peralatan penyembelihan sentiasa tajam, bersih serta dinyauhkuman sebelum dan selepas penyembelihan, melapah dan memotong.

c) Tanggungjawab Penganjur

- i. Mematuhi garis panduan pelaksanaan ibadah korban yang ditetapkan;
- ii. Mendapatkan dari penternak dokumen **Sijil Kesihatan Veterinar, Akuan Kebenaran Pindah dan Permit Sembelihan Luar** dan membawa ke tempat sembelihan bagi tujuan semakan oleh agensi berkaitan;
- iii. Digalakkan menggunakan khidmat tukang sembelih yang mempunyai Sijil Asas Sembelihan / Sijil Tauliah Penyembelih yang masih sah; dan
- iv. Memastikan tukang sembelih dan petugas-petugas lain tidak menunjukkan gejala penyakit berjangkit seperti selsema, batuk dan demam.

d) Tanggungjawab Peserta

- i. Peserta yang masih positif COVID-19 dan dalam tempoh kuarantin perubatan tidak dibenarkan hadir; dan
- ii. Peserta yang mempunyai gejala penyakit berjangkit seperti selsema, batuk dan demam tidak digalakkan hadir.

4.2 Kawalan Pelaksanaan

Pihak-pihak lain yang dinyatakan di perenggan 4.1.1 (a) hendaklah mengambil langkah kawalan berikut:

4.2.1 Kawalan Keselamatan

Pihak jawatankuasa ibadah korban, masjid dan surau disyorkan untuk melantik sukarelawan atau mana-mana badan beruniform yang difikirkan sesuai bagi membantu mengawal keselamatan dan perlindungan di kawasan penyembelihan khasnya bagi:

- i. Melancarkan pergerakan petugas di tapak penyembelihan;
- ii. Mengawal proses pelaksanaan pengagihan yang ditetapkan oleh jawatankuasa; dan
- iii. Mengawal kawasan parkir dan lalu lintas kenderaan.

4.2.2 Lokasi Penyembelihan Korban

4.2.2.1 Penyembelihan hendaklah dilaksanakan di kawasan / premis berikut:

- i. Masjid / surau; atau
- ii. Rumah Sembelihan Pihak Berkuasa Tempatan / Rumah Sembelihan Ruminan Jabatan Perkhidmatan Veterinar; atau
- iii. Rumah Sembelihan Swasta / Persendirian; atau

- iv. Balai raya / dewan / kawasan lapang / tempat sembelihan yang mempunyai sistem saliran yang baik dan kemudahan berkaitan penyembelihan; atau
- v. Mana-mana tempat bersesuaian yang mempunyai sistem saliran yang baik dan kemudahan berkaitan penyembelihan.

4.2.2.2 Pelaksanaan ibadah korban di mana-mana tempat selain daripada senarai kawasan / premis yang dinyatakan pada para 4.2.2.1 seperti di kawasan perumahan, padang permainan dan lain-lain tempat adalah tidak dibenarkan sama sekali.

4.2.3 Had Bilangan Haiwan Korban dan Jumlah Petugas

Tiada had bilangan haiwan korban dan tiada had jumlah petugas.

4.2.4 Kawalan Semasa Pelaksanaan

a) Kebajikan Haiwan

Dalam melaksanakan ibadah korban, sifat ihsan terhadap haiwan yang ingin disembelih perlulah diberikan penekanan seperti hadis yang diriwayatkan oleh Imam Muslim daripada Syaddad bin Aus R.A. yang bermaksud :

“Sesungguhnya Allah telah mewajibkan Ihsan kepada semua perkara, jika kamu berperang menentang musuh, elokkan cara peperangan kamu. Jika kamu menyembelih binatang, elokkan cara sembelihan kamu, rehatkan ia dan tajamkan pisau sembelihan kamu”.

Antara penghayatan dan pengamalan sifat ihsan yang boleh dilaksanakan sewaktu menjalankan ibadah korban ialah:

- i. Haiwan korban hendaklah ditambat / diikat di antara pokok atau tempat penambat dengan jarak yang sesuai di antara satu sama lain;
- ii. Memastikan haiwan korban yang belum disembelih tidak melihat haiwan korban yang sedang disembelih;
- iii. Merebahkan haiwan korban dengan cara yang tidak mencederakannya;
- iv. Penyembelih hendaklah memastikan pisau yang digunakan dalam keadaan yang baik dan tajam.

b) Majlis Pelancaran / Acara Perasmian / Penyediaan Jamuan / Aktiviti Memasak Daging Haiwan Korban / Pengagihan Daging

Semua aktiviti di atas adalah dibenarkan.

4.3.5 **Selepas Pelaksanaan**

a) **Membersihkan Tapak Pelaksanaan Ibadah korban**

- i. Memastikan keseluruhan tapak penyembelihan, melapah dan mengagih dibersihkan;
- ii. Sisa pepejal hendaklah dibungkus dan dilupuskan dengan cara bersesuaian berdasarkan peraturan Pihak Berkuasa Tempatan;
- iii. Sisa cecair seperti darah haiwan sembelihan hendaklah ditanam atau dilupuskan dengan cara yang bersesuaian; dan
- iv. Memastikan semua peralatan yang digunakan dibersihkan, dinyahkuman, disusun dan disimpan di tempat yang selamat.

b) **Tanggungjawab Petugas**

- i. Membuang apron, sarung tangan, pelitup muka (*face mask*) yang telah digunakan ke dalam tong sampah yang disediakan; dan
- ii. Membersihkan tangan dan anggota daripada sebarang kotoran.

5.0 PEMATUHAN

- 5.1 Garis panduan ini akan menjadi rujukan utama agensi, institusi, komuniti dan perseorangan yang terlibat dalam pelaksanaan ibadah korban di Negeri Pulau Pinang. Justeru, pematuhan kepada pelaksanaannya juga akan lebih menyeluruh meliputi:
- i. Semua Institusi Masjid dan Surau di Negeri Pulau Pinang;
 - ii. Jabatan Kerajaan, badan berkanun dan agensi swasta;
 - iii. Institusi kebajikan dan pertubuhan bukan kerajaan (NGO);
 - iv. Komuniti setempat; dan
 - v. Orang perseorangan yang ingin melaksanakan ibadah korban.
- 5.2 Garis panduan ini hendaklah dibaca bersama Garis Panduan Sembelihan Ternakan Korban dan Garis Panduan Pelaksanaan Ibadah Korban yang dikeluarkan oleh Jabatan Mufti Negeri Pulau Pinang¹ dan Garis Panduan Penyembelihan Ternakan Korban yang dikeluarkan oleh Jabatan Perkhidmatan Veterinar Negeri Pulau Pinang².

6.0 PELANGGARAN

Pihak yang dinyatakan di perenggan 4.1.1 (a) yang melanggar garis panduan yang ditetapkan boleh dikenakan apa-apa tindakan di bawah Enakmen atau Akta yang dikuatkuasakan oleh mana-mana agensi berkaitan seperti Polis Diraja Malaysia (PDRM), Jabatan Perkhidmatan Veterinar (JPV) dan Pihak Berkuasa Tempatan (PBT).

¹ Jabatan Mufti Negeri Pulau Pinang, 'Garis Panduan Sembelihan Ternakan Korban' dan 'Garis Panduan Pelaksanaan Ibadah Korban' dalam Buku Garis Panduan Siri 3 (2015), 4-36 <https://mufti.penang.gov.my/index.php/2014-11-12-02-48-39/penerbitan/buku?limit=20&limitstart=20>

² Jabatan Perkhidmatan Veterinar Malaysia, Garis Panduan Penyembelihan Ternakan Korban (2012) https://www.dvs.gov.my/dvs/resources/user_1/2022/BRV/RUMAH%20SEMBELIH/GARIS_PANDUAN PENYEMBELIHAN LEMBU_KORBAN.pdf

7.0 TARIKH KUATKUASA

Garis Panduan ini berkuatkuasa mulai 01 Jun 2023 dan hanya tertakluk untuk pelaksanaan ibadah korban bagi Tahun 1444H / 2023M sahaja.

8.0 PENUTUP

Penularan wabak COVID-19 telah memberikan banyak pengajaran kepada masyarakat khususnya dari aspek penjagaan kebersihan dan kesihatan diri. Sehubungan itu, semua pihak adalah bertanggungjawab untuk terus mengamalkan kebiasaan baharu kehidupan yang lebih baik bagi menjamin kemaslahatan masyarakat dan negara. Diharapkan garis panduan ini dapat membantu pegawai dan jawatankuasa ibadah korban, masjid dan surau serta pihak-pihak lain dalam menjayakan tanggungjawab pelaksanaan ibadah korban di Negeri Pulau Pinang dengan lancar di samping memastikan hasrat kerajaan dalam Pelan Pemulihan Negara tercapai.


(ZULKIFLI BIN RASHID)
Pengarah
Jabatan Hal Ehwal Agama Islam Pulau Pinang.

31 Mei 2023 bersamaan 11 Zulkaedah 1444H